



QEQQATA KOMMUNIA

Qeqqani MISI 3911 SISIMIUT/3912 MANIITSOQ SISIMIUNI QULLERSAQARFIK: OQA.: (+299)
865540 ATAATSIMOORUSSAMIK MAIL: misi@qeqqata.gl

EQEERSIMAARTUMIK ATUINISSAMUT SAMMISUMIK ILINNIARTITSINEQ



Eqeersimaartumik ilinniartitsineq

Kalaallit Nunaanni ilinniartitsinermi ilisimatusarnerup takutippaa, atuartut atuartitsinermi peqataanissaminut kajuminnerusartut ukkassinerusinnaasullu, ilinniartitsinermi suliassiissutit nuannersuuppata, ulluinnarni sungiusimasaannik soqtigisaannillu imaqarpata.

Kalaallit illarneq nuannarisorujussuuat! Tamanna isumaqatigiissutigisinnavaapput. Atuartut aperigutsigit atuarfimmi nuannisarsimanersut, illarsimanerat apeqqutaasarpooq. Taamaammat pingaaruteqarpooq atuartitsinermi sammisat nuannersuullutik atuartunut atugarissaartitsinerulernissaat. Assersuutigalugu pinnguernermik, unamminermik aalanermilluunniik imaqarlutik. Atuartut akulikitsumik aalanissamut kajumissuseqartarput, tamannalu ersittarpoq sukkanilullutik arpasaqattaaraangata/sikkileraangata, qaqqajunnani pinnguaraangata pisuttuaraangataluunniit. Atuartullu aalanissamut kajumissuseqarpata, taava atuartitsinermi aalanermik sammisaqartitsiviusumi aamma peqataanissaminut kajuminnerussapput. Allaaserisap naggataani eqeersimaartumik ilinniartitsisinnaanermut assersuutinik allaqqasoqarpooq, atuartulli aalaatigalutik ilikkagaqarsinnaanerannut fantasi kisimi killiliisuuvooq.

Atuinissamut sammisumik ilinniartitsineq

Atuinissamut sammisumik ilinniartitsineq isumaqarpooq, atuartut ilisimaligassaminnik piviusumik atuinerat. Imaapporlu atuartut ingillutik suliassiissutinik suliaqaannassangitsut imaluunnit ilinniartitsisoq oqaluttoq tusarnaaginnassanngikkaat. Eqeersimaartumilli aalallutik suliaqassapput, timilu atorlugu ilinniagassatik ilinniarlugit.

Ilinniartitsineq arlalitsigut atuinissamut sammisinnaavoq. Ilinniartitsinermi atuinissamut sammisaqartitsineruvoq atuartut ulluinnarni atugaanni ilisimaligassaat atorneqarpat. Assersuutigalugu atuartut walkie talkie atorlugit attaveqatigiinnikkut ikioqatigiikkunik, sumiissusersiorneq sumukarnissamullu nassuaasinnaaneq ilikkassavaat. Atuartut nassuaanneqarsinnaapput qaqqani umiatsiamillu angalaartillutik ikiortissarsiornerminni atorsinnaagaat. Taamaalilluni atuartunut paasinarsissaaq sooq sumiissusersiorneq sumukarnissamullu nassuaasinnaaneq ilinniassallugu. Assersuut alla tassaavoq nerisassiornermi malitassiami atugassanik uuttuisinnaaneq atuartut ilinniassammassuk.

Atuartitsineq atuinissamut sammisaqartitsineruvoq atuartut ilikkagassartik timi atorlugu soorlu arpannikkut, sananikkut, qalipaanikkut, kivittaarinikkut il.il. ilikkarunikkit. Pinnguarneq unammineq imaluunniit annikitsunik suliniuteqarnikkut - assersuutigalugu atuarfik pinnersarlugu, imaluunniit illoqarfimmi ataatsimoorfimmut issiaviliornikkut.

Suna Christensen-ip ilisimatusarnermi misissuinerani atuartitsinermi atuinissamut sammisaqartitsineq nassuaasertalerlugu tunngavilersorneqarpooq. Kalaallit Nunaanni ilisimatusarnikuovoq, tassani misissorlugu ilinniartitsinermi Kalaallit nunaata kulturia qanoq ilaatinneqarsinnaanersoq. Isumassarsiorfiisa ilagaat siornatigut piniarnikkut/aalisarnikkut aamma pinngortitami inuunikkut ilinniartitsineq ingerlanneqartarmat. Isumaqpolorlu siorna taama ilinniartitseriaaseq atorneqarneruleqqittariaqartoq. Paasisimavaalu Kalaallit Nunaanni ilinniartitsinermi aalajangeeqataasut sisamaasut: "Ilinniarfigalugu", "ilikkagaqarfiginaqu", tunniusimasumik ilikkagaqarneq, pisinnaasunik naatsorsuisinnaaneq aamma ilisimasat naapertorlugit misilittagaqrneq.

"Ilinniarfigalugu", "ilikkagaqarfiginaqu" isumaqarpooq, atuartut ilikkagassatik piviusumik iliuuseqarfifalugit ilinniarfigissagaat. Piviusumik tunngaveqartitsinermi pineqarpooq, atuartut piffimmi sumiiffimmiluunniit ilikkagassartik tunngavilimmik paasillugu ilinniartfigissagaat. Assersuutigalugu atuartut nalunaaqquttap akunneranut kilometerinik uuttuineq ilinniassaguniku, sisorarnikkut/sikkilernikkut/arpannikkut sukkaniunnermi nalunaaqquttap akunneranut kilometerit atorneqartut uuttornerini ilinniarsinnaavaat.

Atuartut ilikkagassatik namminneq iliuuseqarfiginerisigut misilittagaqaqarfigilertarpaat, taamaalillutik eqqaamannissinnaanerullutik. Tuttumik piniarniarneq oqaluttunneqarluni ilikkarneqarnavianngilaq. Nammineq tuttumik piniartoqartariaqarpoq, taamaaliornikkut piniarneq misilittagaqaqarfigineqalissammat, tuttut qanoq piissusilersornersut, qanorlu tuttu qanillattortillugu anorimut sammissanerluni.

Atuartut piffimiitillutik ilikkagassaminnik misilittaanikkut *Tunniusimasumik ilikkagaqartarput*, tassani avatangiisit maluginiarneqartarput ilikkagassamullu nutaamut misilittagaqaqalerlutik. Soorlu inuk nutaaq oqaloqatigaaangatsigu. Taava inuup taassuma oqalunnera, isikkua, sumi naapinnerlugu, oqaluunnitsinni susoqarnersoq il.il. maluginiassavagut, taamaalilluta naapiinnarneranut sanilliullugu eqqaamasinnaanerussavarput. Taava atuartut ilikkagassaminnut tunngatillugu (oqaluussaqarunik) misigisaqarunik, tigussaanerusumik misilittagaqaqarfiglersimanera tunngavigalugu eqqaamanninnerusinnaapput.

Taamaaliornikkut atuartut ilikkagaqaqfigisartik piffimmi atorfissaqartitsifimmi attuumassuteqarfigilersinnaassavaat. Suna Christensen-ip pisinnaasunik naatsorsuisinnaanermik *taavaa*, siusinnerusukkut nunap inoqqaavisa kuummi mallit uloriarnarpallaarnerannik ilinniartussaanerannik eqqaanarmat. Tamannalu namminneq kuummi angalatillutik misilittagaqaqarfigilissavaat. Taamaalillutik taama ulorianartorsiortillutik qanoq iliornissartik ilikkarpaat. Atuartut aamma nalunaaqquttap akunneranut kilometerinik uuttuineq ilikkagaqaqfigissavaat, sukkaniunnerminni kina sukkanerunersoq nalunaaquttap akunneranut kilometerinik uuttuinikkut sukkassutsip uottorsinnalerneratigut. Taamaalillutik ilisimasaqarfigilissavaat nalunaaqquttap akunneranut kilometerinik uuttuinermi, ungasissutsit assigiinngikkaluartut assigiingajassinnaasut imaluunniit nalunaaqquttap akunneranut kilometerit sikkilinik sukkatsiallalluni tukkarsoraanni allanngortartut.

Taaneqartut malillugit atuartut *ilisimasat naapertorlugit misilittagaqaqalissapput*. Atuartut piffimmi ilisimasat naapertorlugit qanoq iliuuseqarfiusumi ilisimaligartik misilittagaqaqarfigilissavaat. Taamaalillutik eqqarsaatersuuteqarunik, avatangiisiminni misissuinermikkut akissutinik ujartuisinnaalissapput.

Eqitsimmi ataaniittumi atuartitsinermi timi atorlugu atuinissamut sammisaqartitsinermi siunnersuutit ilinniartitsinermi suliaqartitsinermi isumassarsiorfigineqarsinnaapput.

Nuannisaarina.

Timi atorlugu ilinniartitsinermi timi atorlugu suliaqartitsinermi isumassarsiorfissat.

Illoqarfimmi sumiiffiit assilillugit

Atuartut illoqarfimmi sumiiffiit (nuannarisaminut imaluunniit eqqarsalersitsisumut) ingerlassapput, sumiiffillu mobiliminnik imaluunniit ipad-imik assilillugu. Kingornalu asseq tunngavigalugu taalliuussapput, oqaluttuaaraliussapput, allaatigisaq assigisaanilluunniit.

Suliaq kalaallisut ingerlanneqarsinnaavoq imaluunniit oqaatsit allat atorlugit.

Igaffimmi nerisassiornermi malitassiat malillugit suliaqarneq

Atuartut eqimattanut agguaneqassapput, nerisassiornermilu malitassiaq klassimi eqimattat killiffiannut naleqquttut agguanneqassallutik.

Atuartut ataatsimut malitassiami nerisassiornermi akussat atuassavaat, kingornalu malitassiaq malillugu nerisassiorlutik.

Malitassiaq kalaallisut aammalu allat oqaasii atorlugit imaluunniit atuartitsinermi sammisaq aallaavigalugu allaqqasinnaavoq.

Sammisaq matimatikkimi aamma atorneqarsinnaavoq: Tassani atuartut nerisassornissaminut akunik uutuillutik gangerissapput imaluunniit minuserillutik allatulluunniit uutuillutik. Tassani atuartut nerisassiussapput, taamaalillutik suliaqarnerat siunertaqalissammat.

Iligiikkaarluni sattanneq

Atuartoq ataaseq sattattuussaaq. Atuartup ataatsip ilini pinnguartarfiutigaluni timersorfiusinnaasukkut oqaatsit atorlugit aqqusiakkut ingerlatissavaa, (talerpimmut, saamimmut, unigit, utimut, siumut, allornerit sisamat il.il.). Eqqaamallugu qanoq iliortoqarsinnaanera inerteqqutaasullu oqallisiginissaat.

Atuartut arpaqqusaanngillat. Ajornarerulissappallu isumaqatigiissutigineqarsinnaavoq, sattatumut iliusup qanoq iliuusissap akerlianik oqartassasoq.

Aallaqqaammut akornutissaqannitsumik ingerlalluni aallartittoqarsinnaavoq. Akornusersuutillu ameriartuaartinneqarsinnaallutik.

Naammassigaannilu aqunneqarluni ingerlatsisuullunilu qanoq innersoq oqaloqatigissutigineqarsinnaapput (tatiginninneq akisussaanerlu pillugit oqaloqatiginneq)

Suliaq kalaallisut ingerlanneqarsinnaavoq imaluunniit oqaatsit allat atorlugit.

Halo Halo

Atuartut eqimattaaqqanut agguataassapput. Eqimattat tamarmik walkie talkie-nik tunineqassapput, kingornalu aamma eqimattaaqqanut agguateqqillutik immikkut walkie talkie-mik paarisaqalerlutik.

Eqimattaq 1 qaqqami nunap assinganik pissapput anillutillu.

Eqimattaq 2 qaqqami nunap assingata assinganik kisitsitalimmilli pissapput. Kisitsosit tassaapput sumiiffik ilinniartitsisup naqinnermik ilisiffigisimasa. Taava eqimattat 2-up eqimattaq 1-i walkie talkiekkut naqinnerit sumiiffiinut ilitsersuutissavaa. Naqinnerit ima inissimassapput, kisitsit malillugit katersoraanni oqaasinngorsinnaallutik.

Eqimattaq 2-p eqimattaq 1-imut sumiiffinni naqinnerit suunersut oqaatigisassavaat, eqimattaq 1-illu naqinnerit pappiliamut allattassallugit.

Sammisaq naammassissaq, eqimattat marluusut naqinnernik oqaasinnguereerpata.

Klassimi eqimattat arlaliussussaammata, eqimattat assigiinngitsut nunap assingani sumiiffinni allani assigiinngitsunik kisitsiseqarsinnaapput, taamaalillutik oqaatsit assigiinngitsuusinnaallutik. Eqimattanik nassaarineqartut oqaatsit oqaaseqatigiinngorsinnaapput.

Sammisaq oqaatsit allat atorlugit aamma ingerlanneqarsinnaavoq, oqaatsillu allat atorlugit sumiiffinnut ilitsersuisoqarluni, oqaatsillu nassaarineqartut allamiut oqaasiinik atorneqartunik allanneqarsinnaallutik.

Taggositut/oqaluutitut ussersorneq

Atuartut paarlakaajaallutik karsiminngaannik oqaatsimik makitsissapput. Atuartullu oqaatsip suunera ussersorluni takutissallugu. Atuaqataasa oqaatsip suunera eqqoriartassavaat.

Atuartut kalaallisut oqaatsilluunniit allat atorlugit eqqoriaasinnaapput.

Oqaatsinik stafetti

Ilinniartitsisoq korterpassuarnut oqaatsinik allattuissaqq (Kortit pinnguaatini allani atorneqarsinnaammata asuli suliaassanngillat). Kortit pusillugit natermut ilineqassapput (oqaluutit, taggosit, pissusilerissut, taggosit taartissaat, taggit atiusoq, taggit kisitsaasoq). Atuartut tunuleriaatissapput. Taava atuartoq siulleq arpalluni kortimik tigusissaqq oqaatsillu suussuseqataanut ilillugu. Siulleq utepat tullia aamma taamatut arpalluni tigusiartussaaq. Oqaatsillu tamarmik inississoerpata klassi eqimattanut oqaatsit sussusaannut agguarluni inississussaaq - oqaatsit eqqortumik inississoeqarsimappat?

Kalaallisut oqaatsilluunnit allat atorneqarsinnaapput.

Allattuinermi stafetti

Klassi eqimattanut immikkut pallorfik assakaasulimmik atorlutik agguataassapput. Eqaarsaartarfiup/pinnguartarfiup isuanippit kisitsisit/oqaatsit. Ilinniartitsisoq oqaatsimik taasissaqq eqimattallu oqaaseq allassavaat. Eqimattanilu atuartut paarlakaajaallutik pallorfimmi assakaasulimmiittassapput. Atuartorlu oqaatsimut naqinnermik atugassamik aallertassalluni. Eqimattani atuartut ikioqatigiillutik oqaaseq allassinnaavaat. Eqimattaq oqaatsimik allannissaamut tamakkiisumik naqinnermik aallernermik oqaatsimillu allannermik naammassinneqqaartoq point-innassaaq.

Kalaallisut oqaatsilluunnit allat atorneqarsinnaapput.

Karsimi sukujuit 1000-it

Karsiliassinnut sukujunnik ikioraagitsi - assersuutigalugu atuarfiup matunerani sumi tamaaniittut katarsorlugit ikiorarsigit. Assiginnitsorpassuarnik suliaqarnermi artorsinnaavasi. Assersuutigalugit:

- Atuartut karsimi sukujunnik e-mik aallartittunik ujaassisapput.
- Atuartut marlukkaarlutik sukujuit immikkoortitissavaat, soorlu uumasut ataatsimut, atortut iggavimmeersut ataatsimut il.il..
- Ilinniartitsisoq aamma sukujunnik qulinik taasisinnaavoq - atuartunut minutsi ataaseq qimerloorteriarlugit asserlugit, taava atuartut eqqaamasatik taassassavaat.
- Aamma atuartut *en imaluunniit et atorneqassanersut malillugit immikkoortiterisinnaapput* (Tamanna qallunaatut pitsanerusarpoq).
- Atuartut oqaatsit marluk atorlugit nutaamik oqaasiliorsinnaapput soorlu is+bjørn, dukke+hus. Ersiummik imaluunnit aappersariamik aallartinnersut malillugit immikkoortinnejqarsinnaapput (Tamanna qallunaatut pitsanerusarpoq).

Kalaallisut oqaatsilluunnit allat atorneqarsinnaapput.

Oqaluttoq najoqqutaralugu allannermi stafetti

Atuartut tunuleriaatissapput. Tunuleriaani siulleq sipannimut oqaatsinik imalimmut arpassaaq. Atuartoq oqaatsimik tiguseriarluni utimut arpassaaq tunuleriaanilu tulliuttumut oqaaseq taallugu, taassumalu allattuivimmut/pappiliamut allassavaa. Taava tullinguuttoq sipannimut arpassaaq oqaatsimillu tiguseriarluni tulliminut taallugu il.il.. Sipannip imaarunnissaanut imaluunniit piffissaliussap uninnissaanut pinnguaat ingerlanneqassaaq.

Kalaallisut oqaatsilluunnit allat atorneqarsinnaapput.

Oqaatsit atorlugit attortaanneq (Qallunaatut atuartitsinermi atugassiaq)

Atuartut attortaaliutissapput. Attorneqaraangamik ilinniartitsisumut kortimik makitsisassapput.

Assersuutitut makissinnaallugu *mad*. Taava atuartut akornimminni angalaassapput ilassarsiorlutik, soorlu *kasse = madkasse*. Kammak/oqaaseq nanineqarpat atuartut pinnguaqataaqqissinnaapput.

Oqaatsit 120-it

Oqaatsit 120-it eqaarsaartarfimmi/atuarfiup aneertarfiani sumut tamaanga iliorarneqassapput. Atuartut oqaatsimik ujaasissapput arpallutillu ilinniartitsisumut tunniukkiartorlugu. Atuartup oqaaseq ilinniartitsisumut oqaatigissavaa naqinnerillu taallugit. Eqqortumik naqinnerit taasimagunigit atuartup oqaaseq tigoqqissavaa. Piffissaliussap iluani oqaatsinik sapinngisamik amerlasuunik katersisoqassalluni.

Kalaallisut oqaatsilluunnit allat atorneqarsinnaapput.

Oqaatsit nassaarikkit

Oqaatsit 120-niit oqaatsit arfinillit ilinniartitsisup toqqassavai atuarfiullu aneertarfiani arlaannut iliorarlugit. Atuartut allattaaveeqqananik klassimiittussanik pissapput. Taava atuartup atuarfiup aneertarfianut oqaaseq atuariartussavaa, arpallunilu klassimut uterluni allattaaveeqqaanut allallugu.

Kalaallisut oqaatsilluunnit allat atorneqarsinnaapput.

Tegneserieliorneq

Ilinniartitsisup piffissangaatsiaq atorlugu tegneserie qanoq sanaajunersoq eqqartussavaa - Tegneserie sunik imaqssanersoq - sooq assit atuarsinnaanerigut il.il.. Atuartut pappilamik tegneseri-liorfissamik tunineqassapput. Taava pullattaaqqat atorlugit oqaluttualiussapput oqalutitsunik, eqqarsartitsunik il.il.. Atuartut tegneserie-liaat naammassippata ataatsimut saqqummiisoqassaaq, atuagaqqamilluunniik sanasoqarluni.

Tegneserie-at kalaallisut oqaatsilluunniit allat atorlugit sananeqarsinnaapput.

Karseeqqani nuuttaarneq

Atuarfiup aneertarfiani kipparissunik titartaariarlusi normulorsorsigit.

Atuartut marluk (amerlanerilluunniit) karseeqqaniissinnaapput. Taava atuartup ataatsip eqqoriassavaa atuartut karseeqqamiittut normut nikoraffii plusserneqarunik, minuserneqarunik, gangerneqarunik imaluunniit dividererneqarunik qassissanersoq.

Ilinniartitsisoq aamma karseeqqanut naqinnernik allattuisinnaavoq oqarlunilu taamaallaat ersiutit pissiffigineqassasut, imaluunniit oqaatsimik karsimiit karsimut nooqattaarluni allattoqassasoq. Kalaallisut oqaatsilluunnit allat atorneqarsinnaapput.

Naqinnernik aallerneq/oqaasiliorneq

Atortut: Kortit naqinnerit tulleriinneriniit ataatsimik allassimasoqassapput, assigiit x 10 (amerlanerusinnaappulluunniit).

Atuartut eqimattanut sisamat tallimanik inuttalinnut agguarneqassapput. Naqinnerit assitai nuisillugit unammiffiup isuanut inissinneqassapput. Eqimattat unammiffiup qeqqani suluunnat tunuani nikorfassapput. Eqimattaniittoo ataaseq (marlulluunniit) naqinnermik/naqinnernik arpallutik aallissapput. Eqimattat naqinnerit aasatik atorlugit oqaasiliorniarsarissapput. Assersuutigalugu minutnsini 20-ni eqimattat qassunik oqaasiliorsinnaappat (allattuisinnaappat)? Kikkut siulliullutik qulinik oqaasiliorp (allattuissappat)? Eqimattat naqinnernik aamma oqaaseqatigiliorsinnaapput.

Kalaallisut oqaatsilluunnit allat atorneqarsinnaapput.

Naggateqatigiissaarined

Ilinniartitsup naggateqatigiit arfinillit atuarfiup aneertarfiani nivinngassavai. Taavalu oqaatsit nivingasut naggateqataanik oqaasertallit tippimut ilineqassallutik. Atuartut oqaatsimik makitsissapput, nivingasunilu naggateqataanukarlutik. Atuartut ataatsimoorlutik ikioqatigiissinnaapput.

Kalaallisut oqaatsilluunnit allat atorneqarsinnaapput.

Suliatigut arsamik eqqoriaaneq

Atuartut iligiikkaarlutik arsamik eqqoriaasaqattaassapput. Atuartoq arsamik eqqortsittooq apeqqummik akissuteqassaaq. Atuartoq atuaqatiminukassaaq (aperisussamut), apeqqutit makkuusinnaallutik tabellinik taaguineq imaluunniit ukiup kaajallannerani decembari sorliu? Eqqortumik akinngikkaanni aperisoq ilitsersuisinnaavoq (akissut eqqortoq kortimi allaqqavoq). Atuartoq apeqqummik akisnikoq taava aperisussanngussaaq, aperisuunikorlu arsamik eqqoriartaannermi pinnguaqataasinnaalerluni.

Apeqqutit matimatikkimut, oqaatsini naqinnernik tauguinermut allatigullu suliamut tunngasinnaapput.

Attortaaliunneq.

Ilinniartitsisoq kortinut oqaaserpassuarnik allattuissaq: oqaluutit, taggisit il.il. (siusinnerusukkulluunniit sammisaqarnermi kortit atorsimasat atoqqillugit). Unammiffiup isuani kortit sumut tamaanga iliorarneqassapput. Atuartut akiani nikorfassapput ilinniartitsisorlu qeqqani inissismassalluni. Atuartut kortimik makitsiartorlutik arpassapput. Oqaaseq taggisaanersoq, oqaluutaanersoq imaluunniit piissusilerissutaanersoq suussusersissavaat. Taava atuartut ilinniartitsisumit tigutinnaveersaarlutik utimut arpassapput. Atuartoq pisaritikkuni oqaaseq sumi inissismassanersoq oqaatigissavaa, oqaaserlu atorlugu oqaaseqatigiiliussalluni. Atuartoq akereeruni aallartiffimmukarsinnaavoq. Aallartiffimmipiipput karsit pingasut oqaatsit suunerinik nalunaaqutallit. Atuartut pisaritinngikkaluarunilluunniit oqaaseq karsimut eqqortumut ikissavaat. Kingornalu karsit imai misissorneqassallutik paasiniarlugu atuartut oqaatsinik eqqortumut ikisisimanersut.

Kalaallisut oqaatsilluunnit allat atorneqarsinnaapput.

Batman

Batman-imik (kakkatsumilluunniik allamik atuartut nuannarisaannik) toqqaasoqassaaq. Unammiffiup isuani Batman uligualerluni inississaq. Atuartut sinneri akianut inississapput suaarlutillu "Batman ullumikkut suna uliguanniippa?". Taava Batman akissaaq "uliguanniippoq ..." taavalu korteq nuisillugu, assersuutigalugu pakkaluammik assiliartalik. Atuartup kortip assitaa taallugu suaareerpat (oqaatsit atorneqartut atorlugit), taava atuartut tamarmik pakkaluasaarlutik Batman-imukassapput utimullu arpallutik. Taava korteq nutaaq nuisinneqassaaq, assersuutigalugu pulateriaarsuk, qimmeq, kaavittartoq, sikkili motorilik, balletsimik qitittartoq. Batman taarserneqassaaq...

Kortit qallunaatut oqaasertallit uunga aaneqarsinnaapput:

<https://skoleidraet.dk/media/5414549/batman-ordkort-2.pdf>. Kalaallisut oqaatsinik kortiliortoqarpat (oqaatsilluunniit allat atorlugit), pingaaruteqarpoq nalunassusaata ukiuinut naleqquttumik naleqqussarnissaat.